

**TAHAP PENGETAHUAN AGAMA DALAM KALANGAN BANDUAN PAROL:
KE ARAH PEMBENTUKAN AKHLAK SEJAHTERA**

(Knowledge Level among Prisoners of Parole: Towards Establishment of a Prosperous Character)

Khadijah Alavi, Fauziah Ibrahim, Mohd Suhaimi Mohamad, Wan Shahrazad Wan Sulaiman, Salina Nen dan Norulhuda Sarnon

Abstrak

Pengetahuan agama merupakan elemen penting seseorang individu ke arah pembentukan akhlak yang sejahtera. Oleh itu, objektif kajian dalam artikel ini adalah untuk mengukur tahap pengetahuan agama dalam kalangan banduan parol di Malaysia. Kajian ini dijalankan dengan menggunakan reka bentuk tinjauan keratan-lintang (*cross-sectional survey*) secara kuantitatif. Seramai 280 orang diparol (ODP) yang sedang menjalani program pengawasan parol di Semenanjung Malaysia telah dipilih sebagai responden kajian. Data yang diperoleh telah dianalisis dengan menggunakan ujian deskriptif. Hasil kajian menunjukkan majoriti banduan parol yang terlibat dalam kajian ini mempamerkan tahap pengetahuan agama pada tahap sederhana dan rendah iaitu masing-masing mencatatkan peratusan sebanyak 48.6 peratus. Hasil kajian menunjukkan hanya 2.9 peratus sahaja dalam kalangan banduan parol menunjukkan tahap pengetahuan agama yang tinggi. Hasil kajian ini memberi implikasi ke arah pemantapan program kerohanian yang melibatkan banduan parol bagi tujuan membina kesedaran dan keinsafan yang tinggi untuk menjadi seorang yang berperibadi mulia dan mampu membentuk jati diri yang lebih sejahtera dengan mematuhi peraturan dan undang-undang negara.

Kata kunci: pengetahuan agama, banduan, parol, akhlak, sejahtera

Abstract

Religious knowledge is an essential element of an individual in the formation of a moral wellbeing. This article measures the level of religious knowledge among inmates who are under parole in Malaysia. The study was conducted using the cross-sectional survey method. A total of 280 inmates under paroles (ODP), which are currently undergoing parole supervision program in peninsular Malaysia have been selected as respondents. The data obtained were analyzed using descriptive test. Results showed that the majority (48.6 percent) of the paroles involved in this study display a moderate to low level of religious knowledge. It also showed that only 2.9 percent of the paroles have a high level of religious knowledge. These findings have implications towards strengthening the spiritual program involving prisoners under parole for the purpose of turning them into noble individuals with high awareness and respect and able to comply with the rules and laws of the country.

Keywords: religious knowledge, inmates, parole, moral wellbeing

Pengenalan

Agama merupakan satu anutan dan kepercayaan yang berkembang sebagai suatu ilmu pendidikan jiwa (dalaman) yang mengajar manusia untuk menyelami jiwa mereka sendiri serta hubungkaitnya dengan kekuasaan Tuhan. Sifat *zuhud* (sederhana) dalam menangani kerenah dunia mampu diterjemahkan dalam tingkah laku manusia ke arah usaha untuk merealisasikan kesempurnaan moral. Walaupun hal ini dilihat sebagai satu ilmu yang terpencil kerana pendidikan jiwa adalah hak dan peribadi seseorang tetapi ia adalah salah satu cara yang berkesan dalam menangani kerakusan jiwa untuk tunduk kepada sesuatu tindakan yang berunsurkan negatif (Razaleigh Muhamat @ Kawangit & Ahmad Tarmizi Talib, 2010).

Aspek keagamaan penting untuk memastikan seseorang individu tidak terjebak melakukan perkara-perkara negatif yang boleh merosakan akhlak dan jati diri. Dalam proses pemulihan banduan parol, aspek keagamaan perlu diberi penekanan khusus kerana melalui keagamaan ia membantu memberi kesedaran yang tinggi dalam kalangan banduan parol untuk membina kehidupan yang lebih sejahtera. Alarid, et al., (2008), mendefinisikan parol sebagai suatu proses perpindahan banduan secara berperingkat dari penjara ke masyarakat sebagai suatu langkah integrasi untuk mengurangkan kadar berulang kali masuk penjara atau residivis. Sistem parol juga dikenali sebagai satu sistem pembebasan bersyarat seseorang banduan sebelum tamat tempoh menjalani hukuman penjara sebenar disebabkan oleh perlakuan baik mereka. Melalui sistem ini, banduan dikehendaki menjalani baki hukuman di luar penjara di bawah pengawasan pegawai parol melalui Akta Penjara 1995 (Pindaan 2008).

Oleh itu, bagi memastikan proses pemulihan dan pengawasan parol dapat dilaksanakan dengan jayanya, maka pengetahuan agama dalam kalangan banduan perlu diutamakan bagi mengelak mereka daripada terjebak semula melakukan kesalahan yang sama. Ini kerana kajian yang dijalankan oleh Johnson, et al., (2000) mendapati bekas banduan yang mempunyai kepatuhan yang tinggi kepada agama merupakan individu yang kurang terdedah melakukan aktiviti jenayah kepada masyarakat. Individu yang mempunyai pegangan agama yang baik dilihat cenderung menjadikan agamanya sebagai panduan dalam membuat sesuatu keputusan bagi menentukan kehidupan yang berjaya. Pandangan ini selari dengan kajian yang dijalankan oleh O'Conner dan Parreyclear (2002) yang mendapati pesalah/banduan yang kerap terlibat dengan aktiviti keagamaan menunjukkan kadar penurunan dalam pelanggaran peraturan yang berkaitan dengan banduan. Dapatan daripada kajian ini juga menunjukkan bahawa faktor keagamaan merupakan aspek penting dalam proses pemulihan yang melibatkan pesalah banduan di penjara.

Kajian yang dijalankan oleh Roman, et al., (2007) pula mendapati pesalah banduan yang mempunyai pegangan agama dan spritual yang rendah menunjukkan kadar keciciran sebanyak 34 kali dalam program pemulihan penjara berbanding dengan pesalah banduan yang telah berubah secara positif melalui keagamaan/spiritual. Manakala kajian yang dijalankan oleh Allen, et al., (2012) pula mendapati bahawa individu yang memiliki daya tindak keagamaan secara positif mempunyai simptom kemurungan yang rendah berbanding

mereka yang mempunyai daya tindak keagamaan yang negatif tetapi menunjukkan simptom kemurungan yang tinggi. Menurut Allen, et al., (2012) lagi, penghuni penjara yang mempunyai tahap kemurungan yang tinggi juga kebiasaannya mempunyai masalah yang berkaitan dengan kesihatan diri.

Seseorang individu yang berpegang kuat terhadap ajaran agama dilihat sentiasa menjalankan tanggungjawab agama dengan baik, melakukan tingkah laku berlandaskan tuntutan agama serta akan mendahulukan suruhan agama dalam segala hal yang dilakukan. Kajian yang dijalankan oleh McDonald dan Gorsuch (2000) mendapati agama merupakan suatu cara seseorang individu untuk menggunakan keyakinannya dalam menangani tekanan dan masalah-masalah yang wujud dalam hidupnya. Manakala kajian yang dijalankan oleh Lewis (2002) pula mendapati wujudnya perhubungan yang signifikan antara individu yang mempunyai pengetahuan agama dan kebahagiaan hidup. Sesungguhnya agama memberikan arah dan makna kehidupan kepada seseorang. Selain itu, seseorang yang mempunyai pengetahuan agama yang tinggi juga dilihat mampu mengurus tekanan dan dapat menangani sesuatu keadaan sukar dalam keadaan yang tenang (Kasberger, 2002).

Sebaliknya, pakar dalam bidang keagamaan menyatakan bahawa kurangnya penghayatan dan pengetahuan agama dalam kalangan generasi muda dan belia juga merupakan faktor utama menyebabkan statistik yang berkaitan dengan masalah sosial meningkat terutama hal yang berkaitan dengan aktiviti penyalahgunaan dadah (Yusuf, 2005). Menurut al-Muhasibi (243 Hijrah) ilmu tawasuf Islam ialah pendidikan jiwa secara teori dan amali, penawar bagi penyakit hati, menanam sifat terpuji, membuang sifat buruk, mengawal hawa nafsu, melatih kesabaran, keredhaan dan ketaatan. Ia juga latihan melawan hawa nafsu dan muhasabah diri terhadap apa yang dilakukan dan perkara yang perlu ditinggalkan, menjaga hati daripada pintu kelalaian dan fikiran negatif. Begitu juga ilmu tasawuf meninggalkan perkara yang menghalang seseorang hamba daripada mendekati Allah SWT. Meninggalkan setiap perkara yang dekat di hati dan menghalang daripada berzikir. Tasawuf berupaya meyakinkan dan mefokuskan seseorang individu melalui puji-pujian kepada Allah SWT (Yusuf, 2005: 83).

Beberapa kajian yang dilakukan oleh pakar luar dan dalam negara juga mempunyai pandangan yang sama iaitu pengetahuan agama merupakan benteng yang kukuh bagi menghalang penularan perlakuan yang tidak bermoral dan melindungi generasi muda serta belia daripada terlibat dengan aktiviti negatif (Michelle et al., 1989; Sabitha, 1995; Hodge et al., 2001; Mahmood Nazar, et al., 2004; Sharifah et al., 2010 dan Fauziah et al. 2012). Hampir semua berpandangan menyatakan bahawa pengetahuan agama dan sosialisasi positif dalam keluarga merupakan senjata yang berkesan untuk membina benteng yang kukuh dalam kalangan generasi muda dan belia agar mereka tidak terjebak dengan aktiviti penyalahgunaan dadah.

Pendekatan keagamaan yang diperkenalkan oleh Agensi Antidadah Kebangsaan (AADK) dalam merawat dan memulihkan penagih dadah melalui terapi psiko-kerohanian boleh

dipraktikkan kepada banduan parol yang sedang mengikuti program pengawasan di luar penjara. Terapi psiko-kerohanian menfokuskan tentang kaedah solat, mengaji, berzikir dan kelas-kelas pengajian Islam. Manakala program inabah pula menggunakan pendekatan keagamaan seperti mandi, zikir, qiyam al-lail, puasa, solat dan menjaga adab dalam merawat individu yang terlibat dengan aktiviti penyalahgunaan dadah (Mahmood Nazar, 2005; Yusuf, 2008). Dapatan kajian yang dijalankan oleh Dara et al. (2013) mendapati rawatan untuk penagih dadah melalui kaedah inabah yang memberi tumpuan kepada aspek ketenangan jiwa melalui ilmu tawasuf mampu membersihkan diri dan dapat meyedarkan seseorang individu tentang tujuan asal penciptaan mereka sebagai khalifah Allah SWT dan seterusnya memupuk rasa tanggungjawab yang tinggi dalam diri. Memandangkan aspek keagamaan merupakan elemen yang penting untuk membantu menghindari seseorang individu daripada kembali terjebak dalam melakukan kesalahan yang bertentangan dengan nilai-nilai masyarakat, maka kajian ini dilakukan bertujuan untuk mengenalpasti sejauhmana tahap pengetahuan agama golongan banduan yang sedang menjalani program pengawasan parol.

Hasil kajian diharap mampu memberikan input berguna ke arah memantapkan program keagamaan dalam kalangan banduan parol yang sedang berusaha menjadi seorang manusia yang berguna dan seterusnya mampu berdikari dan memberikan khidmat bakti kepada negara. Atas dasar itu, objektif kajian adalah untuk mengukur tahap pengetahuan agama dalam kalangan banduan yang sedang menjalani program pengawasan parol di Malaysia.

Kaedah Kajian

Kajian ini merupakan kajian berbentuk tinjauan dengan menggunakan reka bentuk tinjauan keratan-lintang (*cross-sectional survey*) secara kuantitatif dan dianalisis secara deskriptif. Analisis deskriptif menurut Chua (2006) merupakan statistik yang digunakan untuk menghuraikan ciri-ciri variabel. Manakala reka bentuk keratan-lintang menurut Malhotra, Sham, & Crsip (1996) merupakan suatu kaedah yang melibatkan pengumpulan data terhadap satu jenis sampel daripada populasi yang dikaji secara sekali sahaja berdasarkan kepada atribut responden yang sedia ada.

Kajian ini menggunakan kaedah soal selidik untuk mendapatkan hasil kajian. Bagi mengukur tahap pengetahuan agama dalam kalangan banduan parol, alat ukuran dibina sendiri oleh pasukan penyelidik dengan memperoleh nilai kebolehpercayaan yang tinggi iaitu 0.732. Jenis item yang digunakan dalam bahagian ini adalah berbentuk Likert empat skala di mana pilihan-pilihannya disusun mengikut kesesuaian iaitu (1) sangat tidak setuju, (2) tidak setuju, (3) setuju dan (4) sangat setuju. Nilai kebolehpercayaan untuk skala yang digunakan dalam kajian ini adalah tinggi iaitu 0.732.

Dalam kajian ini, populasi kajian merujuk kepada banduan atau orang yang diparol. Orang yang diparol (ODP) merupakan banduan yang dipilih oleh pihak Jabatan Penjara Malaysia untuk menjalani baki hukuman di luar penjara disebabkan oleh perlakuan baik mereka sewaktu menjalani hukuman di dalam penjara di bawah pengawasan pegawai parol

berdasarkan Akta Penjara 1995 (Pindaan 2008). Kesemua mereka yang terlibat dalam kajian ini terdiri daripada mereka yang sedang menjalani program pengawasan parol di bawah kendalian Jabatan Penjara Malaysia. Persampelan rawak bertujuan digunakan untuk memilih ahli-ahli iaitu ODP yang masih mengikuti program pengawasan parol di seluruh Semenanjung Malaysia. Seramai 280 ODP yang terdiri daripada pelbagai etnik telah terlibat dalam menjayakan kajian ini.

Kerja-kerja pengumpulan data telah dijalankan sebaik sahaja pra-uji borang soal selidik dilaksanakan sepenuhnya serta kebolehpercayaan dan kesahan borang kaji selidik disempurnakan. Sebelum pengumpulan data dimulakan, pengkaji telah mendapatkan kebenaran daripada Ketua Pengarah Jabatan Penjara Malaysia (JPM) untuk menjalankan penyelidikan di Cawangan Parol yang terpilih di seluruh daerah di Semenanjung Malaysia. Setelah kelulusan diberikan oleh pihak JPM, pengkaji kemudiannya telah menghubungi dan membuat temu janji dengan Pengarah Parol cawangan yang terlibat bagi menetapkan tarikh sebenar untuk kerja-kerja pengutipan data dilaksanakan. Pengedaran borang soal selidik kajian kemudiannya telah dijalankan secara rawak setelah mendapat kebenaran untuk menjalankan kajian daripada pihak JPM.

Sewaktu kerja-kerja pengutipan data dilakukan, pengkaji telah dibantu oleh Pegawai Parol untuk menjalankan kerja-kerja pengedaran dan pengutipan data. Kaunselor dan pegawai-pegawai parol yang terlibat terlebih dahulu diberikan penerangan dan taklimat ringkas berkaitan kaedah pengumpulan data oleh pengkaji. Seterusnya, Pegawai parol telah mengumpulkan ODP mengikut bilangan yang dikehendaki dan kemudiannya mengasingkan mereka kepada dua kumpulan seperti berikut:-

1. ODP yang boleh membaca, dan
2. ODP yang tidak boleh membaca.

Tujuan pengasingan kumpulan berkenaan adalah untuk memudahkan proses bagi melengkapkan borang soal selidik di kalangan responden. Bagi ODP yang boleh membaca mereka telah menjawab setiap soalan pada borang soal selidik yang diedarkan secara sendirian dan diawasi oleh Pegawai Parol dan pengkaji sendiri. Manakala bagi kumpulan ODP yang tidak tahu membaca, Pegawai Parol telah ditempatkan di dalam kumpulan mereka untuk membantu membacakan satu persatu soalan yang disediakan dengan tujuan memudahkan proses menjawab soalan. Dalam masa yang sama, pengkaji juga bertindak mengawasi responden sewaktu mereka menjawab soal selidik bagi membolehkan mereka bertanya sekiranya terdapat soalan-soalan yang masih tidak difahami.

Bagi mendapatkan jumlah borang soal selidik yang tepat, pengkaji telah memeriksa setiap helaian pada borang soal selidik sewaktu pengutipan borang dijalankan. Ia bertujuan memastikan setiap responden mengisi borang soal selidik dengan sempurna dan lengkap. Sekiranya terdapat mana-mana borang yang didapati tidak diisi dengan lengkap, pengkaji akan memulangkan semula kepada ODP dan memastikan mereka menjawab soalan yang tercicir dengan bantuan daripada Pegawai Parol. Melalui pendekatan ini, pengkaji telah

berjaya mengumpulkan borang soal selidik yang tepat berdasarkan kepada bilangan sampel yang dikehendaki iaitu sebanyak 280 ODP.

Data kajian telah dianalisis dengan menggunakan ‘*Statistical Package for the Social Science for Windows*’ (*SPSS for Windows*). Statistik deskriptif digunakan untuk menentukan frekuensi, peratusan dan purata kajian.

Hasil kajian dan perbincangan

Dalam kajian ini, pengetahuan agama merujuk kepada pengetahuan tentang asas pendidikan agama, pegangan serta amalan agama yang dipegang oleh banduan parol yang dikaji. Jadual 1 menunjukkan nilai min bagi domain pengetahuan agama adalah 1.54 dengan sisihan piawai .553. Hasil kajian terhadap domain pengetahuan agama dalam kalangan 280 ODP yang sedang menjalani program pengawasan parol menunjukkan majoriti mereka berada pada tahap pengetahuan agama yang sederhana dan rendah iaitu masing-masing mencatatkan sebanyak 48.6 peratus. Hasil kajian juga seterusnya menunjukkan hanya 2.9 peratus daripada ODP menunjukkan tahap pengetahuan agama pada tahap yang tinggi.

Jadual 1: Tahap Domain Pengetahuan Agama OPD

Pengetahuan Agama	N=280	Peratus (%)	Min	SD
Rendah	136	48.6	1.54	.553
Sederhana	136	48.6		
Tinggi	8	2.9		
Jumlah	280	100		

Nota: rendah (≤ 2.00), sederhana (2.01-3.00), tinggi (3.01-4.00)

Secara keseluruhan, hasil kajian mendapati aspek pengetahuan agama agak membimbangkan dalam kalangan ODP dan usaha yang serius dan bersepadu perlu dirancang oleh pihak JPM untuk memperkukuhkan pengetahuan agama mereka. Ia bertujuan untuk memastikan mereka tidak mudah terpengaruh dengan tingkah laku dan perkara-perkara negatif yang boleh membawa kepada keadaan residivis dan menjejaskan tahap kesejahteraan diri untuk menjadi insan yang berguna. Kajian yang dijalankan oleh Johnson, et al., (2000) mendapati bekas banduan yang mempunyai kepatuhan yang tinggi kepada agama merupakan individu yang kurang terdedah untuk melakukan aktiviti jenayah kepada masyarakat. Pengetahuan agama yang baik juga mampu memberikan makna kehidupan kepada seseorang. Bagi banduan parol yang mempunyai pegangan agama yang kukuh, mereka dijangka kurang terdedah untuk cenderung dan kembali semula melakukan kesalahan-kesalahan lampau yang menyalahi undang-undang dan peraturan negara.

Berdasarkan analisis kajian yang dijalankan ke atas 280 ODP yang sedang dalam pengawasan parol mendapati seramai 73.2 peratus dalam kalangan ODP yang terlibat dalam kajian ini mengakui bahawa mereka merupakan seorang yang mempunyai

pengetahuan dari aspek keagamaan yang baik (item 1 - Jadual 2). Manakala hampir sebahagian besar (80 peratus) daripada ODP pula mengakui bahawa mereka sudah tidak terlibat dengan aktiviti yang tidak bermoral seperti mencuri, kesalahan jenayah dan terlibat dengan aktiviti penyalahgunaan dadah (item 2). Keadaan ini berkemungkinan disebabkan oleh pengawasan dan pemantauan yang konsisten yang dilakukan oleh pegawai parol terhadap ODP sehingga memberi kesan positif terhadap diri mereka. Sewaktu dalam tempoh pengawasan juga mereka ini dilihat telah berjaya menghindari diri daripada melakukan perkara yang menyalahi peraturan dan undang-undang negara dan berharap keadaan ini dapat terus dipraktikkan oleh mereka setelah selesai menjalani tempoh pengawasan parol oleh JPM.

Jadual 2: Peratusan item pengetahuan agama OPD

No	Item	Sangat Tidak Setuju	Tidak Setuju	Setuju	Sangat Setuju	Min
		(%)	(%)	(%)	(%)	
1	Saya tidak mempunyai pengetahuan agama	27.5	51.1	16.1	5.4	1.99
2	Saya masih melibatkan diri dengan aktiviti tidak bermoral	34.3	45.7	15.4	4.6	1.90
3	Saya seorang yang tidak mementingkan agama dalam kehidupan harian.	38.2	43.9	12.1	5.7	1.85
4	Saya seorang yang suka mengabaikan sembahyang	30.0	43.2	22.9	3.9	2.01
5	Saya lebih suka menyimpan duit untuk diri sendiri daripada menderma	11.8	48.9	32.9	6.4	2.34
6	Saya suka membaca kitab agama walaupun sibuk	4.3	30.7	54.3	10.7	2.71
7	Saya sanggup memberi rasuah untuk mendapat apa saja yang saya inginkan.	40.4	42.1	13.6	3.9	1.81

Walaupun kesemua ODP yang terlibat dalam kajian ini pernah terlibat dengan perkara yang menyalahi peraturan dan undang-undang negara, namun pasukan pengkaji mendapati bahawa kebanyakan mereka ini masih boleh dibentuk untuk menjadi insan yang sejahtera. Pandangan ini dilontarkan berdasarkan penemuan kajian ke atas 280 orang responden yang kebanyakannya masih mempunyai kemahuan dan keinginan untuk berubah dan kembali ke pangkal jalan. Seramai 73.2 peratus dalam kalangan ODP yang dikaji meluahkan pandangan bahawa mereka bukanlah seorang yang suka mengabaikan sembahyang. Mereka juga kebanyakannya suka membaca kitab agama walaupun sibuk (65 peratus- item 6) dan tidak sanggup memberi rasuah untuk mendapatkan perkara yang diinginkan (item 7). Perkembangan dan kesejahteraan diri yang positif seperti yang ditunjukkan dalam pengakuan ODP dalam kajian ini telah memberi input yang amat bermakna kepada pihak

Penjara yang telah berusaha gigih mengubah mereka untuk menjadi seorang insan yang berguna. Menurut kajian yang dijalankan oleh McDonald dan Gorsuch (2000) agama merupakan suatu cara seseorang individu untuk menggunakan keyakinannya dalam menangani tekanan dan masalah-masalah yang wujud dalam hidupnya. Manakala kajian yang dijalankan oleh Lewis (2002) pula mendapati wujudnya perhubungan yang signifikan antara individu yang mempunyai pengetahuan agama dengan kebahagiaan hidup. Menurut Kasberger (2002), agama memberikan arah dan makna kehidupan kepada seseorang banduan. Ini adalah kerana seseorang yang mempunyai pengetahuan agama yang tinggi dilihat mampu untuk menguruskan tekanan dan dapat menangani sesuatu keadaan kesukaran dalam keadaan yang tenang.

Cadangan dan Kesimpulan

Berdasarkan hasil kajian yang dijalankan, pihak berkepentingan adalah disarankan untuk mencari pendekatan dan strategi yang lebih berkesan untuk membantu meningkatkan tahap pengetahuan agama dalam kalangan banduan parol. Ini kerana hasil kajian mendapati tahap pengetahuan agama dalam kalangan banduan parol menunjukkan keputusan yang membimbangkan dan sekiranya tidak ditangani mampu memberikan implikasi yang kurang baik ke atas proses pemulihan banduan. Keperluan memperkasakan modul kerohanian dalam kalangan banduan parol amat diperlukan supaya mereka lebih menjiwai dan dapat mengaplikasikan ilmu keagamaan dalam meneruskan kehidupan seharian. Justeru itu, adalah disarankan supaya modul kerohanian keagamaan dijadikan sebagai modul teras dalam program pengawasan parol. Ia bertujuan untuk memberi kesedaran dan keinsafan yang tinggi dalam kalangan banduan parol agar mereka dapat membina kekuatan diri dan peribadi. Selain itu ia juga membolehkan banduan mengamalkan sifat-sifat yang terpuji dan menjauhi sifat yang tercela sehingga mampu membimbing mereka untuk kembali kepada masyarakat sebagai seorang yang produktif dan berakhlak mulia. Modul keagamaan ini perlu dipertingkatkan dengan memberi penekanan dan pendedahan secara konsisten tentang hukum dari aspek keagamaan bagi mereka yang melakukan perkara-perkara yang menyalahi peraturan dan bertentangan dengan nilai-nilai agama. Pihak berkepentingan juga adalah disarankan untuk menjalinkan hubungan kerjasama yang lebih kukuh dengan guru-guru agama yang bertauliah untuk bersama-sama membantu membimbing ODP ke arah kehidupan yang lebih sejahtera sewaktu mereka berada dalam program pengawasan parol supaya proses integrasi mereka ke dalam masyarakat dapat dijayakan dengan lebih berkesan.

Penghargaan

Kajian ini telah mendapat sokongan dan pembiayaan oleh Kementerian Pengajian Tinggi Malaysia melalui Geran Penyelidikan Fundamental (FRGS) kod penyelidikan: FRGS/1/2011/SS/UKM/02/26. Ucapan penghargaan juga ditujukan kepada Fakulti Sains Sosial dan Kemanusiaan, UKM dan semua yang telah terlibat dalam menjayakan kajian ini.

Rujukan

Alarid, F.L., Cromwell, P & Del Carmen, V. R. (2008). *Community-Based Corrections 7th edi.* Australia: Wadsworth Cengage Learning.

- Allen, R.S., Harris, G.M., Crowther, M.R., Oliver, J.S., Cavanaugh, R., Philips, L.L. (2012). Does religiousness and spirituality moderate the relations between physical and mental health among aging prisoners? *International Journal of Geriatric Psychiatry*.
- Byron R. Johnson. 2006. Better Kind of High: How Religious Commitment Reduces Drug Use Among Poor Urban Teens, Manhattan Institute for Policy Research, *Center for Research on Religion and Urban Civil Society Report No. 2000-2*. at www.manhattan-institute.org/html/cr_12.htm (December 6, 2006).
- Chua Yan Piaw. 2006. *Kaedah dan Statistik Penyelidikan: Kaedah Pendidikan*. Kuala Lumpur: McGraw Hill.
- Edward M. Adlaf, 1985. Drug Use and Religious Affiliation: Feelings and Behavior, *British Journal of Addiction*, Vol. 80, No. 2, pp. 163-171.
- Fauziah Ibrahim. 2012. Memperkasakan pengetahuan agama dalam kalangan remaja bermasalah tingkah laku: ke arah pembentukan akhlak remaja sejahtera. *Jurnal e-Bangi*, 7 (8) 084-093, April Special Edition, 2012.
- Hodge, D. R., Cardenas, P. & Montoya, H. 2001. Substance use: Spirituality and religious participation as protective factors among rural youths. *Social Work Research*, 25(3), 153- 161.
- Jamal Ali, Sallahuddin Hassan & Noor Al-Huda Abdul Karim. 2009. Kos ekonomi penyalahgunaan dadah. *Jurnal AntiDadah Malaysia* Jilid 6, No. 2, Dis 2009.
- Johnson, B., Spenser, D.L, David, B.L., & Micheal, M. (2000). A Systematic Review of the Religiosity and Delinquency Literature. *Journal of Contemporary Criminal Justice*. 16(1):32-52.
- Kasberger. E.R. 2002. A Correlational Study of Post-Divorce Adjustment and Religious Coping Strategies in Young Adults of Divorced Families. *Second Annual Undergraduate Research Symposium CHARIS Institute of Wisconsin Lutheran College*. Milwaukee.
- Lewis, C. A. 2002. Church attendance and happiness among Northern Irish undergraduate
- Malhotra, N.K., Hall, J., Sham, M & Crsip, M. (1996). *Marketing Research: Applied Orientation (1st Edition)*. Sydney: Prentice Hall.
- Michelle, C., Thomas, R.M. & Sinyangwe, I.M. 1989. Adolescent Conceptions of „Moral”: Haiti The United Sates, & Zambia. *Youth & Society*, 21 (2).
- Mohd Rohani Mat Diah, Elanngovan Muniandy & Muhammad Yazid Ismail 2009. Senariopenyalahgunaan dadah bagi tahun 2009. *Jurnal AntiDadah Malaysia* Jilid 5, No. 1, Jun 2009.
- Morgan M and Grube JW. 1991. Closeness and peer group influence, *British Journal of Social Psychology*, 30, 159-169
online: <http://bpsoc.publisher.ingentaconnect.com/content/bpsoc/bjsp>
- Muhammad Yusuf Khalid. 2005. Gejala sosial dan penyelesaiannya dari perspektif tasawuf. Dalam Syamsul Bahri Andi Galigo, Khairunnezam Mohd Noor, Wan Mohd Fazrul Azdi Wan Rozali dan Rozita Abdullah (Eds), *membangun masyarakat moden yang berilmu dan berakhlak*. Penerbit Kolej Universiti Islam Malaysia, Kuala Lumpur.

- O'Connor, T., P. & Perreyclear, M. 2002. Prison Religion in Action and Its Influence on Offender Rehabilitation. *Journal of Offender Rehabilitation*. 35(3-4): 11-33.
- Razaleigh Muhamat @ Kawangit & Ahmad Tarmizi Talib. 2010. Penyelesaian permasalahan belia dari perspektif agama. *Malaysia Journal of Youth Studies*. 3: 38-52.
- Roman, C.G., Wolff, A., Correa, V., & Buck, J. 2007. Assessing Intermediate Outcomes Of a Faith-Based Residential Prisoner Reentry Program. *Research on Social Work Practice*. 17 (2) : 199-215
- Sabitha Marican & Mahmood Nazar Mohamed. 1995. Pencemaran Budaya Remaja: Siapakah Yang Bertanggungjawab. *Jurnal Kebajikan Masyarakat*, 18(1), 21-35.
- students: No association. *Pastoral Psychology*, 50, 191-195.
- Syarifah, M.N., Turiman, S., Syamsilah, R., Rahil, M., Haslinda, A., Ismi Arif, I. & Mursyid, A. 2010. *Laporan Kajian Fenomena Merempit dan Potensi Remaja Lasak di FELDA*. Kementerian Pengajian Tinggi Malaysia.
- Wong-McDonald A, Gorsuch RL. Surrender to God: An additional coping style? *Journal of Psychology and Theology*. 2000;28:149–161.

Khadijah Alavi
Pusat Pengajian Psikologi dan Pembangunan Manusia
Fakulti Sains Sosial dan Kemanusiaan,
Universiti Kebangsaan Malaysia, 43600, Bangi, Selangor
(khadijahalavi@gmail.com)